

Der Zehendt Artikel.

Von des Bergkschreibers beuelch.

Er verordnete Bergkschreyber / sol mit vleis darauff sehen / das Unser Bergkordnung / inn sachen dabey er ist / von meniglichen gelebet / auch die / soniel sein Ampt betriefft / selbst halten / Vnd wo er darwider / gehandelt / befünde / dasselbe vorkohmen / vnd was er nicht vorkohmen künde / vnserm Hauptman oder Amptsverwalter / oder Bergkmeister anzeigen.

Er sol sich auch / in sonderheit des Bergkmeisters billichen beuehls verhalten / alle verleyhe tage / mit seinen beuolhenen notdürfftigen Bergkbüchern / im bestettigen erscheinen / alle gemutte / Alte vnd Newe Zechen / Massen vnd Stöllen / durch wen / wie / vnd auff was gebirgen / gengen / Klüfften / vnd geschickten / darzu mit was vnderschied / die gemutte / vorliehen / vnd bestettiget werden aus den mutzedteln / so alle mal fürgelegt sollen werden / inn sein Lehenbuch / eygentlich vnd deutlich einschreiben / dem Muther odder Lehentreger / vnnnd were des begert / mit vorwissen / des Bergkmeisters / darvon Copien vnd abschrift geben.

Darmit auch aller verdacht vnd vnbilliche gezencke verhütet / sol der Bergkschreiber die Vortrege oder Schiede / so durch Bergkmeister vnd Geschworne / abgeredt / vnd inns Bergkbuch zuverleyben gebeten werden / erstlich auffs Papir brengen / den Parteyen inn beywesen Bergkmeisters vnd Geschwornen vorlesen / Vnd wo es als dann / der abrede gemess / von parten gewilliget / vnd vom Bergkmeister beuolhen wird / dem Bergkbuch / nach seiner gelegenheit / doch one sondern verzugk / von worte zu wort einleiben / vnd was der massen eingeschrieben wird / das sol verbündig vnnnd krefftig geacht vnd gehalten werden.

Auff das auch inn Bergksachen / vnnnd hendeln / alle vnordnung verhütet / die eingeschriebene sachen vnnnd hendel / mit wenig mühe vnnnd nachsuchunge / schleuniger zufinden seind / so sol der Bergkschreiber zu denselben sachen / vnderschiedliche Bücher haben / wie hernach volget / Nemlich ein eygen Buch.

Zu Muthungen